

ماذا يحدث عندما يخدع رجل امرأة
أو
الطريقة المضمونة للتخلص من البقع

تأليف: رشا عبد المنعم

المشهد: امرأة فى منتصف الثلاثينات ترتدى الأسود، وحيدة تجلس على مقعد فى الجانب الأيسر من المسرح، خلفها ساعة حائط، وأمامها منضدة خشبية، فوق المنضدة مسجل صغير ومجموعة من أشرطة الكاسيت، وعلى يمينها حوض استحمام كبير يعلوه صنوبر ماء، وفى الخلفية فى الجانب الأيمن من المسرح مجموعة من الفساتين الملونة (أزرق- أحمر- أخضر) مرصعة بالتجاور، ومعلق فوق كل منها إكسسوار وحذاء من نفس لون الفستان، وبجانبيهم مرآة طويلة.

(1)

المرأة تمسك بالمسجل وتزوده ببطارية، ثم تزوده بشريط كاسيت، ثم تضغط على زر التشغيل، وتستمتع بتركيز. ملحوظة: الصوت الصادر من المسجل يمكن أن يكون هو نفسه صوت المرأة.

المسجل: هذه هى الطريقة المضمونة للتخلص من البقع
1- الأدوات المستخدمة: إناء واسع- مكياك مناسب- ملعقة كبيرة للتقليب.
أثناء هذا تخرج المرأة وتعود وهى تحمل بيدها ملعقة خشبية كبيرة و باليد الأخرى بخاخة وكوب متوسط الحجم، تضع البخاخة والكوب فوق المنضدة والملعقة بجانب حوض الاستحمام.
المسجل: 2- المقادير: مقدار ملء ثلثى الإناء بالماء - مقدار مناسب من مادة البوتاس أو الصودا الكاوية.
أثناء هذا تفتح هى صنوبر الماء لتملأ حوض الاستحمام، ثم تخرج وتحضر كيسا شفافا مملؤا بمادة الصودا الكاوية وتضعه فوق المنضدة ثم تفتح المسجل مرة أخرى.
المسجل: 3- طريقة التحضير:
1- يترك الماء على الموقد حتى يصل إلى درجة الغليان
2- تضاف مادة الصودا الكاوية بالمعدل المطلوب وتقلب جيدا حتى تذوب
أثناء هذا تلمس الماء للتأكد من سخونته يلسعها ثم تبدأ فى تكييل الصودا الكاوية لكنها مع تكرار العملية تمل وتمسك بالكيس وتفرغ محتواه فى حوض الاستحمام، ثم تمسك بالملعقة الخشبية وتظل تقلبه وسط البخار المتصاعد.
المسجل: 3- ثم توضع البقعة المراد إزالتها وتترك قليلا فى الماء حتى يزول أى أثر لها، وهذه هى الطريقة المضمونة لإزالة أعتى البقع من الملابس ناصعة البياض.
تغلق المسجل.

(2)

المرأة تجلس على مقعدها بجانب حوض الاستحمام، ثم تتناول المسجل وتغير شريط الكاسيت و تضغط على زر التسجيل، تمسك بالملعقة الخشبية و تتكلم:
ناس كثير وجودهم فى حياتنا مش أكثر من بقعة، بقعة كبيرة وناشفة، بقعة ما ينفعش معاها محاولات الغسيل المتكرر، بقعة جامدة، زى بقعة دم كبيرة، بعد مانشفة دلخوا عليها عصير مانجة وعناب، وعاصوها بطبيخ حمضان مطبوخ بلية، وبعديها جه لا مؤاخذه بغل وقضى حاجته عليها، وفضلت متعرضة للهوا سنين لغاية ما باش القماش اللى تحتها ومبقاش فاضل غير البقعة نفسها.

بقعة زى دى ليه تحتفظ بيها فى حياتك لو كنت تقدر تمحيها؟ إلا إذا كنت من هواة جمع البقع، وأنا أعرف ناس كثير من العينة دى، بس فى الحالة دى ما تضايقش لما تلاقى الناس بتجنبك أو بتبعد عنك، لأن الريحه المقرفة اللى هتطلع من البقع دى مش هينجح أى برفان مهما كان قوى إنه يخففها.

أما لو أنت من النوع اللى بيحب ينصف حياته أول بأول، وما بيحبش البقع تحتل أى مكان فيها، يبقى الوصفة دى هتفيدك جدا لأنها مش بس بتزيل البقع لا دى بتتغلغل جوه البقعة وبتزيل المواد الملوثة اللى بتسببها. **(صمت)**

رغم إنه كان عارف إنى ما بكرهش حاجة قد البقع إلا إنها كانت العلامة الوحيدة اللى سبها لى.

تعود لتقف وتظل تغلب مادة الصودا الكاوية فى حوض الاستحمام بالملعقة الخشبية، وتتساعد الموسيقى

إظلام

(3)

تدخل المسرح وهى ترتدى الفستان الأزرق بحذائه وإكسسواراته، تنظر إلى الفستان ثم تشرع فى الكلام:

كان بيحب الفستان ده جدا، كان بيقل لى لما بتلبسيه بحس إنى مش محتاج أى فياجرا، وإنك مش هتقدرى تحتلمى النشوة وهتطلبى منى الرحمة لأحسن قلبك يقف من كتر السعادة، بس طاقة فستانك الأزرق الخلاب حتخلبنى وتخلينى أرفض أرحمك.

تصمت قليلا ثم تكمل:

لو إنه فى الحقيقة هو اللى كان محتاج كل أقرص الفياجرا اللى فى الدنيا عشان أنا أرحمه، بس ده كان وهمه عن نفسه اللى بيحب يعلنه دائما، ودى كانت حقيقتى اللى عمرى ما بينتهاله.

صوت دقات الساعة، تنظر إليها.

إظلام

(4)

صوت دقات الساعة مرة أخرى، تدخل وقد ارتدت الفستان الأحمر وإكسسواراته وحذاءه، تلقى بالفستان الأزرق على المنضدة. تنظر إلى الساعة ثم تتحدث:

أتأخر، دائما بيتأخر وينسى إن الحاجات الحلوة ما بتستناش وما بيلحقهاش المتأخرين زيه.

نفسى تيجى مرة فى ميعادك، مرة واحدة تلحق ولو حاجة حلوة واحدة. أدينى خلعت الفستان الأزرق اللى بتحبه، أدى آخر حاجة حلوة كنت هتشوفها راحت. الفستان الأحمر ده أنا عارفة أنك ما بتجهوش، عرفت ده من أول مرة شفتنى لابساه، كنا رايعين سنيما نشوف فيلم رومانسى، لكن للأسف كان اتشال، ودخلنا بداله فيلم رعب، وسط الدم الكثير على الشاشة كنت أنا البقعة الحمرا الوحيدة فى صالة المتفرجين، قربت على ودنى وسألتنى: مين اللى جابلك الفستان ده؟ وده ماكانش لأن إحساسك الفظيع ذلك إنه هدية من غريم سابق، لأ، ده لأنك كنت كاره الفستان وكنت عايز سبب تصدرولى عشان مالبسوهوش تانى.

بس حظك، لأ مش حظك، أفعالك، تأخيرك كان السبب فى أنك اتحرمت من آخر حاجة حلوة كنت مجهزها لك، وهتبص بصتك الأخيرة على الفستان الأحمر اللى انت بتركهه.

تمسك بالفستان الأزرق من فوق المنضدة تنظر له باستياء:

أما أنا فعمرى ما حببت اللون الأزرق؛ لأنه ما بيبنش البقع الحمرا.

أنا فاكدة أول بقعة حمرا فى حياتى كانت فى مريلة المدرسة الزرقا، جريت على حمام المدرسة وفضلت هناك بقية اليوم الدراسى، وأما الدادة خدت بالها وفهمت، ضحكت وقالتلى: خراط البنات خرطك. شفت فى عينيها فرحة ما شفتهاش فى عين أمى اللى ملاها الخوف لما عرفت، بعدها حسيت كأنى واحدة تانية، وبقي مطلوب منى اتكلم واتحرك بطريقة مختلفة، وغصين عنى بقيت أبص لزميلاتى فى الفصل على إنهم لسه عيال، بس فضل عندى إحساس، نفس الإحساس، فى كل مرة كان بيحصل ده كنت بحس إنى مكسوفة من نفسى جدا وكأنى عاملة حاجة غلط.

كنت فاكدة إنك انت اللى هتسمعننى وتشوفنى وتحسننى وتخلصنى من ضعفى ده، **(يتصاعد انفعالها)** وفى أول مقابلة بيننا لبستك الفستان ده لما عرفت إنك بتحب اللون الأزرق. لكنك لاشفت ولا سمعت ولا حسيت، **(تهدأ قليلا)** وضعفتنى أكثر بعد ما سبتلى تانى بقعة حمرا فى فستان أزرق ما بتطلعش مهما حاولت أغسلها.

تلقي بالفستان الأزرق فى حوض الاستحمام
يعلو صوت دقات الساعة تنظر إليها، تخفت الإضاءة من على وجهها تدريجيا
وتنسحب إلى البخار المتصاعد.

(5)

مازالت ترتدى الفستان الأحمر، فى حالة انتظار وقلق تنظر إلى الباب:
 الباب ده اللى كنت بشتاق لصوت جرسه وأنا مستنياه، وكأنه الباب اللى هيفتحلى الجنة، كان بيبقى بالنسبالي جزءاً من الحيطه بعد مايمشى.

صوت الباب وهو بيترزع كان أفضع صوت ممكن أسمع فى حياتى، كنت كل ما اسأله عن مستقبل علاقتنا يغضب ويمشى ويرزع الباب وراه، عمره ما حس إنه كان بيقله على صباغى، كنت بقعد أعيط ورا الباب زى طفلة بتتعاقب، كنت بحس المكان بيضيق و نفسى كمان بيضيق، وكأنه خد كل الأوكسجين معاه، كنت بتعب أوى، بس كنت بتعب أكثر لما بلاقيه راجع بثقة وكأن مفيش حاجة حصلت... ومع رجوعه يرجع السؤال جوابية:

إحنا ليه ما بنتجوزش؟ ما كانش عنده إجابة غير إنه يسكت ويسبنى لحيرتى.

أويمشى ويرزع الباب وراه. خدت وقت كبير عشان أعرف إن الإجابة كانت أبسط من حيرتى دى، الإجابة كانت هى السؤال نفسه (إحنا ليه ما بنتجوزش؟) لو قلبناه: إحنا ليه نتجوز؟

نسمع صوت رنين التليفون لكنها لا تتحرك ولا تعأ به:
 كانت آخر مكالمه بيننا، قالهالى، قالهالى بعد ما فضل أيام وشهور بينكر اللى إحساسى كان بياكده، أيام وشهور حاسة كل حاجة فيه بتبعد، نظرته، لمسته، نبرة الحب فى صوته، ما قليش غير لما عرفت، ما قليش غير لما شفت بعينه، ما قليش غير وأنا مش محتاجه يقلهالى، قالهالى فى التليفون، ما كلفش نفسه يستنى لما تبقى عينى فى عينه ويقلهالى:

فيه ست تانية فى حياتى.... غلطتك مش غلطتى، إنتى اللى خلتينى أبص بره.

فيه ست تانية، فيه! فيه فى حياته ست تانية، زى ما فيه تلاجة وديب فريزر، فيه ست تانية. وكأن كان فيه أولانية، وكأن أنا كنت ست أولانية فى حياته.. كان أول مرة يقلى كلمة معناها إنى ست؛ وهو يقلى: فيه ست تانية. للحظة فكرت أشكره لأنى فى الفترة الأخيرة كنت بدأت أسأل نفسى: هو أنا ست ولا بطاطساية، ومعرفش ليه لقيت إجابة ضمنية فى كلامه: أنا ست، بس ست أولانية، لأن فيه ست تانية، وهى مش أنا طبعا.

طب كويس إنى طلعت الأول فى حاجة.

أما إن دى غلطتى، فدى حاجة ما كنتش محتاجه يقلهالى، كل مسلسلات التليفزيون والأغانى والأفلام العربى بتقلها: لو خنتى راجل فانتى مجرمة ودى غلطتك، ولو راجل خانتك فدى غلطتك برده، أنا المسئولة عن منح ومنع تصاريح الخيانة فى العالم كله، مش بس كده أنا مسئولة عن حاجات تانية كتير، أنا المسئولة عن ورقة شجر نشفت

فى جنابن القاهرة، وأنا اللى عملت الأزمة الاقتصادية، وأنا المسئول الحقيقى عن الحرب فى العراق ولبنان، وأنا اللى بأدير عمليات اغتيال رموز منظمة فتح وحماس فى فلسطين، وأنا اللى خططت لكل جرائم قتل واغتصاب أطفال الشوارع والبنات البكر، ولما بعرفش أظبط موضوع الاغتصابات ده باكتفى بالتحرشات والهياج الجماعى، أنا سبب الكبت فى كل دول العالم التالت. ودلوقتى وبما إن ما بقاش فى مجال للشك إن دى غلطتى، فإيه اللى المفروض أعمله عشان أصلح غلطتى دى، إذا كنت أنا اللى خليتك تبص بره، فأكيد مفيش تصليح للغلطة دى غير إنى أخليك تبص جوه، جوه أوى، جوه أكثر من أى جوه تصورته، بس وانت بتبص فى جوه الجديد مش هتلاقينى، لأن أنا هافضل بره، بره أى جوه يخصك. **تعود لتمسك بالملعقة الخشبية وتظل تغلب بعنف**

(6)

نسمع صوت جرس الباب، ترتبك، وتظل تبحث:
المخدر؟... فىن المخدر؟!

تظل تبحث حتى تجد البخاخة تحملها وتخرج مسرعة، تعود بعدها بقليل محبطة:

مش هو. مهما كنت مستنياه كنت دايمًا بحس إنه جه فجأة، لأنى عمرى وأنا مستنية ما كنت واثقة من مجيه، ياما أدانى مواعيد وما جاش، وياما أدانى مواعيد وجه بعدها بأيام.. بشهور، ما كانش بيكلف نفسه يقلى حتى حجة محترمة:
أسف يا حبيبتى أصل وأنا ماشى بنت ببرنيطة كانت ماشية وراية تفت لبانتها لزقت فى ضهر بنطلونى ولما قعدت فى التاكسى لزقت، وخذوا وقت طويل عقبال ما عرفوا يطلعونى... أسف يا حبيبتى رموشى كانت بتوجعنى طول الليل، أسف يا حبيبتى طلعلى كلى فى صباعى الصغير فجأة فماقدرتش آجى... أسف يا حبيبتى أصل المنبه كان متقدم 24 ساعة فعشت امبارح على أنه النهارده ولما جه النهارده وعرفت ما بقاش ينفع أعيش النهارده على إنه النهارده فاعتبرته بكرة، وعشان كده النهارده الحقيقى وقع فى النص وميعادنا وقع معاه.

حجج واهية وعبيطة، حتى ما كانش بيتعب نفسه شوية عشان يعمل سبب للتعاطف أو حجة منطقية، للدرجة دى كان أنانى وكسول، للدرجة دى كان واثق فى مشاعرى. **(تضحك) ده حتى مرة قلى:**

أسف يا حبيبتى أصل الزهرية اللى فوق الترابيزة انفجرت فجأة فى وشى قلتله من غير ما أحسسه إنى شكة فى كلامه: الزهرية انفجرت! تقصد أنبوبة البوتاجاز. سكت شوية وقلى آه بالظبط أنبوبة البوتاجاز. قلتله أنبوبة البوتاجاز اللى فوق الترابيزة! تقصد اللى جنب البوتاجاز. فكملة بنقة: أيوه. اللى جنب البوتاجاز... ببساطة ومن غير ما يحس بأى حرج بقت الزهرية اللى فوق الترابيزة اللى انفجرت فجأة فى وشه الأنبوبة اللى جنب البوتاجاز اللى انفجرت برده فى وشه.

(7)

صوت جرس الباب، ترتبك هذه المرة أيضا، تضع روج أحمر سريعا أمام المرأة، وتحمل البخاخة وتخرج مسرعة.

تصور أول: تعود وهى تسحب جسد رجل، تضعه بجانب حوض الاستحمام، وتجلس لتستريح، ثم تخرج ثانية وتعود حاملة حقيبة يده، وصندوق هدايا كبير تضعه على المنضدة، لا تعأ به، وتذهب إلى جسده، تضع وسادة صغيرة تحت رأسه ثم تبدأ بخلع ملابسه ويمكن فى هذه اللحظة أن تمارس معه طقس من طقوس الحب ينتهى بأن تمسك الوسادة وتكتم بها أنفاسه.

تأخذ المقعد وتجلس بعيدا عن الجثة، ثم تنهض مرة أخرى وتسحبها حتى تضعها فى حوض الاستحمام، ثم تلملم ملابسه وأشياءه وحقيبة يده وتحببها.

تصور ثانى: يمكن الحفاظ على رمزية فكرة إزالة البقعة بحيث يعقب خروجها إظلام ثم تفتح الإضاءة مع صوت دقات الساعة وهى تحتضن ملابسه وأشياءه دون أن نشاهد عملية القتل على المسرح أو نشير لها. تدق الساعة مرة أخرى تنظر لها ثم تعاود النظر لأشياءه التى مازالت تحتضنها:

دى بقايا راجل بيتبخر دلوقتى.. شئ يدعو للراء والشفقة.. الحاجات دى كان بيبقى ليها فى خيالى معنى ثانى خالص، كنت بحس إنها بتنافسنى فيه، دايمًا كان شايفها أكثر منى، ساعته مثلا، بعد ما كان بياخد اللى هو عايزه، أيا كان اللى هو عايزه، بيدأ بيص فى ساعته كثير، وتظهر مواعيده ومشاغله، كان بيقدّر وقته ويحسبه ويخاف عليه، عمره ماحسب وقتى وعمرى اللى اتبخر معاه زى ما هو بيتبخر دلوقتى. كان بيقلى: /نتى بتفكرى فى العمر ليه /أدينا بنقضى وقت لطيف. وقت لطيف! الحب عنده كان وقت لطيف، وقت لطيف ما كانش من حقى أعكره بأسئلتى واستفساراتى عن بكرة، ما كانش من حقى أهز بهجته بدموعى، اختياراته المحسوبة جدا واللى حطتنى فى خانة الرفاهية ما كانش ينفع اتمرد عليها وابقى فى خانة الجد. /يه يعنى كبرتى طب ما أنا برده بأكبر. لأ... دى مش زى دى.

الزمن فى حياة الست حاجة تانية خالص. الزمن فى حياة الست معناه فقدان ثقة وإيمان ورغبة. الزمن معناه إن السفنجة اللى جواها مصت خبرات زيادة، أزيد من استيعاب أى راجل ليها.

الزمن معناه دبلان عيون، وهشاشة عظام، ورخاوة روح. الزمن معناه تجاعيد، وترهلات، وخشونة صوت. الزمن معناه فقدان خصوبة وانقطاع طمث وانتهاء تاريخ الصلاحية. الزمن فى حياة الست حاجة تانية خالص. تدق الساعة تحتضن أشياءه أكثر

إظلام

(8)

تدخل مرتدية الفستان الأخضر وترمى بالفستان الأحمر الذى خلعتة فى حوض الاستحمام كما تلقى بأشياءه قطعة تلو الأخرى أثناء المونولوج التالى:

الفستان ده كان هدية من الراجل الوحيد اللى عمره ما جرحنى، لأنه كان قوى، كان بيقول اللى جواه أول بأول وما بيخافش من المواجهة. ياه... إزاي ما خدتنش بالى قبل كده؟! إنت خدعتنى لإنك ضعيف، ما كنتش واثق فى نفسك ولا فى حد، أنا دلوقتى افتكرت أول مرة أتقابلنا و قلتلك أسمى، ما صدقتنيش، رغم أنها كانت أول مرة أقول لحد من أول مرة أسمى. كنت مخدوع عشان كده كنت خايف، وخوفك خلاك هش، هشاشتك... هشاشتك أكثر حاجة حبتها فيك، هشاشتك اللى كانت بتخليك ما تسحتملىش تشوف حد بيتألم، هشاشتك اللى كانت بتخليك تعرف تميز الجمال ولو مدفون فى مزبلة، هشاشتك أكثر حاجة حبتها فيك هى اللى خلتك خدعتنى. هشاشتك هى اللى خلتك خفت منى، أيوه خفت منى، ما كنتش قادر تسيينى، وكنت محتاج سبب براك يخليك تعمل ده حتى لو كان السبب ده ست تانية، خفت منى وعشان كده كنت بتحن لضعفى، كنت بتجرى عليه لما أقلك أنا محتاجالك.. بس أنا كثير كنت بأبقى محتاجالك وما بقلش.

يعنى إنت خدعتنى لإنك كنت خايف، خايف لأنك ضعيف، وقويت عليه لأنك أضعف من الحب.

كنت أضعف من الحب لأنك كنت مليون بقع، ما تقلقش كلها شوية وأخلصك من كل البقع اللي جواك، ودى آخر هدية أقدر أقدمها لك.

تذكر الهدية، تلتفت إلى صندوق الهدايا الموضوع على المنضدة، تنظر له وتتسائل:

ياترى جايللى إيه؟

تنهض وتفتح الصندوق فتجد فستان أبيض معه حذاء وإكسسوار من نفس اللون

تنظر للأمام فى ثبات وتبتسم.

إظلام

(9)

تدق الساعة يضاء المسرح، نراها جالسة وهى ما زالت ممسكة بالفستان الأبيض، تنظر إلى حوض الاستحمام:

دلوقتى انت بتتبخر، كلها ساعة ومش هيفضل منك حاجة، حتى العضم هيتبخر، العضم، أخيرا هوصله، كان جسمى دايمًا بيغوص فى طبقات لحمك عشان أوصل لنقطة عضم واحدة، خسارة إنى هشوفه بس مش هقدر ألمسه، من زمان وأنا نفسى ألمسه، كان منتهيالى إنى لو لمسته أبقى لمست روحك، كنت مصدقة جدا إن الروح بتسكن العضم، عشان كده العضم أول حاجة بتتخلق وآخر حاجة بتتحلل، خسارة، لو تفضل حنة عضم صغيرة ما يبوشهاش البوتاس، سنة، ضفر، عضمة حوض، صباغ... ليه ما فكرتش أشيل حاجة من دى للذكرى قبل ما أحطك هنا، كان لازم أعمل كده... عارف ليه؟!.. لإنك هتوحشنى.. هتوحشنى جدا.. فى حاجات كتير فيك مش هعرف ألاقىها مع حد تانى، فى أحاسيس كتير حسبتها معاك عمرى ما هحسها مع حد غيرك.. مش ندم، لأن بعدك هيساعدنى ألاقى حاجات ما كنتش فيك، وأحس أحاسيس ما حسبتها معاك.

إظلام

(10)

تدق الساعة، تفتح الإضاءة، نراها وقد ارتدت الفستان الأبيض:

إنت كده اتبخرت تماما..

مابقاش فاضل منك حاجة، وما بقاش فاضل جواى حاجة وحشة ليك.

البقعة اللي عملتها لى راحت خلاص، ورجعت صافية ، طاهرة.

ماعنديش ذرة كراهية ليك.

وبالطريقة دى حافظت على حبك جوايه للأبد

سامحنى لو سببتلك أى ألم.

ما كانش قصدى أألمك. . كان قصدى أطهرك.

تخرج من المسرح فى ثوبها الأبيض

إظلام